

Pwoo denshee de Pita ran

¹ Wen Pita, laalep nDaa Jesu Kristi, kən ran pwoo desə nə, shidəm pee wun nen de Naan wur kə ten bilip wun, de wun a məzep ndəən nyil desə, kəzak, wun a tətiiit ndəən nyil mPontus, kə Galati kə Kapadosiya, kə Eshiya kə Bifiniya.

² Naan puun wur kə ten bilip wun, mbəkə nwun dee a nen wur mo nciit-nciit kə pan wur. Riin wur Debang, nə le kə nwun dee a nen debang mo, kə wu kələng doo nDaa Jesu Kristi, mbəkə toom wur vwang wun dee a debang. Yit naajeel nNaan kə zuum wur mo wurang ndəən wun.

Naan shin seen depoo mmun

³ Mu kwoop Naan puun kə Daa fun Jesu Kristi, mbəde a mbee yit naajeel wur, dangbe wur shin seen depoo mmun ndəən Lāa wur, kaadi wur yol kə Jesu a peemúut sə. Mu leyit nkaa seen depoo desə nə.

⁴ Kəzak, mu sekop de baa nə ncam wam, koo dee a debish kas. Naan wur kə tap dak mənə le mbee mun ndəən dengnaan.

⁵ Wun de Naan wur tap wun shibal wur, mbəde wu shinzeen, parkyes nyil desə, be wun nkat seen de Naan wur nwoo nə agaak parpuus mənə.

⁶ Mpeemənə wu cìn retnyit des, mbee mbii de Naan wur tap dak mo le mbee wun ndəən dengnaan, koo de nyaksə be wun kə pətuup dewat mbee jeel de wuu shwaa mo. Wen man nənee, <<

jeel de wuu shwaa mo nyaksə, a mbee reppee lee bejee.

⁷ Mbii de nə le dang wuu naajeel desə mo, a mbəkə gurum mo naa di nə shinzeen fuu nə azeen-nzeen. Koo a zinariya, mbii de nə a mə nyil desə, be gurum moo cam ret nə a shi wus. Nə aasə nciit-nciit kə shinzeen fun de nə met nzinariya. Duk nkaa cam shinzeen fuu nyaksə, mbəkə parpuus de Daa Jesu Kristi wur mbaaji, be gurum mo kwoop Naan, kə mo cin dedes wur mbee wun.

⁸ Koo de baa wu naa Jesu Kristi wur kə yit kas, dangbe wu wal wur, kə wu shinzeen zak. Nə aasə, be wun kə retnyit hakyeng, de baa mee gurum mak sat nə kas.

⁹ Katdang wu sat a ncínzeen ndəən Jesu Kristi dak, be wun a nkaa kat seen de ngha-ngha.

¹⁰ Gyet be nensatpwoo Naan mo satpwoo nkaa bam desə de Naan wur cín mmun, dewur kə ten dak nə mbee mun. Nensatpwoo Naan nə mo tap bilip shi dyen, mbəkə mo man ar de Naan wur yool bam gurum mo di.

¹¹ Gyet Riin nDaa Jesu Kristi ndəən pətuup fur mo, gyet nə sat mmo jir nkaa jeel de Jesu wur yool shwaa, akudang wur del ndəən dedes wur. Gyet moo leyit mbee parpuus de mbii desə mon ngam di.

¹² Naan wur kám mmo nənee, << baa mon mmak naa gam nə ndəən teer fur mo kas, dangbe a wun naa gam nə. NYaksə nen de mo satpwoo diiret nə nwun, mo kə ten sat mbii mo nwun jir, kaadi Riin nNaan dewur tong adeng sham, wur shìn bal mmo sə. Nen lep Naan mo shikáa fur, mo rəbet naa mbii desə nə mo.

Mwaan de nə ret nen Naan mo

¹³ Mpeemənə wu ɗak pan fuu mo, mbəkə nwun ɗar ɗi balbal mbee cìn ɗak nNaan. Wu tap kə káa fuu mo rəret, kə nwun leyit ɗi a nkaa ɗeret ɗe Naan wur ncìn nwun parpuus ɗe Daa Jesu wur baajì zak.

¹⁴ Wu sat a nkələng ɗoo nNaan, kə nwun cìn mbii ɗewur sat mo. Kaji wu waa wu baa shibwoon mbee cìn mbii ɗebish, ɗe gyet moo shwat nwun akudang wuu man pwoo Naan kas.

¹⁵ Nə ret kə nwun man nənee, << Naan ɗewur pərep wun kə nwun ɗee a nen wur mo, wur a Naan ɗebang. Nə a təng, be wu yit kə mwaan fuu mo ɗee a ɗebang ndəən mbii mo jir.

¹⁶ Nə a nciit-nciit kə mbii ɗe mo kə ran ndəən bəət haal Naan sə nənee, << <<Wu yit kə mwaan fuu mo ɗee a ɗebang kaadi an a ɗebang sə.>>

¹⁷ Wuu pet Naan a puun fuu, mbəmənə be nə ret kə nwun kələng wur, kə nwun shin ɗedes wur, kə wu kə mwaan ndəən ɗyen ɗeret ndəən mbii ɗe wuu cìn mo jir. Kaadi wuu tong ɗi ndəən yil ɗesə, mbəɗe Naan wur ntokɗyeel nkòo we a nciit-nciit kə mbii ɗe gurun cìn.

¹⁸ Wu man nənee, << Daa Jesu wur seet wun, a mbəkə wur put ɗi kə wun ndəən wàar debuu mə gurun ɗe gyet puun fuu moo cìn. Baa Daa Jesu wur seet wun a shi zinariya, koo azurfa ɗe moo wat sə kas,

¹⁹ ɗangbe wurang wun a shi toom wur ɗe nə kirim zam. Jesu wur ɗee a kaa təm ɗe mo bilip nə, mbəkə mo can nə kaa mbiizuum ɗe shang sə, wur ɗi baa wur kə mee shikbish, koo mee rap kas koo daben.

²⁰ Naan wur kə ten sat mbii desə aasə, akudang wur leyil desə, nənee, << Jesu wur mbam gurum mo a ndəən ar desə. NYaksə, kaadi yil nə kus kə kyes, be Naan kām Jesu mmun agaak mbee wun.

²¹ nDəən Jesu, be wu shinzeen nNaan dewur yol kə wur a peemúut, kə wur cin dedes wur zak. A mbəmənə, be wu shinzeen nNaan, kə wu leyit fuu mo a nkaa wur.

²² Wu ten wu le pətuup fuu mo dee a dəbang, mbəde wuu cin mbii de azeen, de pwoo Naan nə sat nənee wu cin mo, azeen-nzeen, wuu wal nendəm ndang Kristi mo. Mpeemənə nghan nkaa sat nwun nənee, << wu walnshak shi pətuup fuu mo, kə bal fuu mo jir.

²³ Kaji wu mundər nənee, << moo baa làa wun di apoo a buu kas, dangbe mbee bal di nə ndəən pwoo wur de nə ji kə seen. Baa mee mbii mak wat pwoo wur nə kas, nə tong di mbe nghan-nghan. Baa a nen deməmurep mo làa wun nyaksə kas, dangbe a Naan de baa wur muut kas, a wur shin seen desə nə nwun.

²⁴ Gyet nyam be mo ran ndəən bəət haal nNaan nənee: <<<<Gurum mo jir mo a kaa shit de <<nə fii sə, men fur nə a kaa <<pel de nə ciir fii kəlak-kəlak sə, <<mbee reppee lee, be shit kə pel moo fii.>>

²⁵ Dang pwoo Naan nə di mbe nghan-nghan. Pwoo desə nə a pwoo deret de muu sat nə nwun.

Naan wur kə ten bilip wun

2

¹ Kaadi Naan wur kə ten shin seen depoo desə nwun, be nə ret kə nwun pwat kə mbii dəbish mo

ndəən seen fuu mo jir. Kaji wu baa wu cìn d̥ung kas. Kaji wu dee a nen de moo satpwoo, d̥angbe mo waa ciir cìn mee mbii d̥ed̥ik kas. Kaji wu leyit nkaa mbii kə mee gurum kas. Kaji wu sat mee pwoo d̥ebuu nkaa gurum mo kas.

² Dang nə ret kə mwaan fuu nə dee a kaa mə jep de mo lāa mo apoo, de moo tang a wur pee nəən fur mo shidaar-shidaar sə. Nə ret kə neen am tu wun mbee wur d̥i nə azeen-nzeen. kə mənə, a pwoo Naan de nə shin bál nwun shidaar-shidaar, mbe parpuus de Naan wur mbam wun.)

³ Nə ret kə nwun sat a tang pwoo Naan shidaar-shidaar, mbəde wun shikáa fuu wu man nənee, << Daa fun Jesu Kristi wur wal mmun zam.

⁴ Mpeemənə, wu jì kus kə Daa Jesu Kristi, dewur shin seen ngurum mo. A wur a jwak de nə kə seen de ngha-ngha, de gurum mo cii nə kaa mbii de baa nə kəkoop nə kas sə. Dangnaan bilip wur, mbəde pə Naan d̥i, be wur kəkoop nə hakyeng.

⁵ Wun shikáa fuu wun kə seen, mbəmənə nə ret kə nwun dee a kaa jwak de Naan wur d̥yiklu d̥ishik sə, mbəde Riin wur d̥ebang wur ndəən wun. Wun a nen de Naan wur kə ten bilip wun, mbəkə nwun dee d̥i a pris wur mo, mbəkə nwun cìn d̥ak wur d̥i shi pətuup məndong ndəən ar de nə shang wur, mbee səm kə Jesu Kristi.

⁶ Gyet mo kə ten ran ndəən bəət haal Naan, de Naan sat nənee:<<Wu naa ghan nkaa le mee nhik ndəən Zayon, <<mbəkə lu fen d̥ar d̥i hakyeng. <<Koo a wii de shinzeen wur, be baa ngwe mənə nkələng yitlwaan kas.>>

⁷ Wun nen de wuu shinzeen ndəən wur, be wur kəkoop nə pee wun d̥i hakyeng. Dang nen de baa

mo shinzeen wur kas, be nānee: <<<<Ngək de gyet nen dyiklu mo cii, <<a nā yol dee a nghək de lu nā ɗar nkaa nā.>>

⁸ Mo waa baa ran ndəən bəət haal Naan nānee, << <<<<Desə nā a nghək de nā le gurum <<mo canshii kə mo pal.>>

Mbii de nā le ɗang gurum mo canshii kə mo pal, nā a mbəde mo cii cìn mbii de pwoo Naan sat nā mo cìn. Naan wur kə ten sat yam-yam nā nā nden aasə.

⁹ Dang pee wun, be wun a ɗang di Naan wur kə ten bilip. Kə wu dee a pris de moo cìn ɗak mishkoom ɗedes. Wun a ɗang di Naan wur tap bilip wun le nshin. Wun a nen de Naan wur kə ten cak wun mbee səm wur. Naan wur bilip wun, a mbəkə wu sat di agaak mbii ɗedes ɗeret, ɗewur kə ten cìn mo nwun, kaadi wur put kə wun ndəən pekwoo, kə wur jì kə wun mbəkə nwun mwaan di ndəən peebang wur, desə nā aapwoo ngurum mo zam.

¹⁰ Gyet nyam be baa wun a nen Naan mo kas, ɗangbe nyaksə, wun a nen wur mo. Gyet nyam be baa wu man yit naajeel nNaan kas, ɗangbe nyaksə wu man yit naajeel wur.

Nə ret kə nen Naan mo shin ɗedes mishkoom mo, kə nen de moo cìn se mishkoom nkaa mo jir.

¹¹ Wun de wen wal nwun mo, taji wu munder nā wun a məzep mo, de baa wuu tong a vit ndəən nyil desə kas, mbəmənə be ghan kən ɗang pə wun, taji wu lesuk fuu mo ndəən shikbish, de pətuup fuu moo rəbet cìn nā kas. Mbəde kyeet kə mbii mənə moo rəbet wat seen fuu mo.

¹² Wu sat a mwaan-mwaan de nā ret nyit nnen de baa mo a nen Naan mo kas, mbəkə koo de

gurum moo satpwoo debuu nkaa wun, be mo naa mbii deret de wuu cìn mo, mbəkə mo ciir, kə mo kwoop Naan de parpuus dewur nji naa mun.

¹³ Mbə səm kə Daa fun Jesu Kristi, be wu sham kə kaa fuu mo ndər kə nen de Naan shin iiko mmo ndəən nyil desə. Wu shin dedes mishkoom dewur naa gurum mo jir.

¹⁴ Kə nwun kələng gofna mo, de mo kə ten bilip mo, mbəkə mo kar nen de moo cìn mbii debish mo di.

¹⁵ Nə nret nNaan nyit, kat dang mwaan fun mon ndəre, mbəde katdang mwaan fuu mo a ndəre, be wun nle kə nyemdemwen de baa mo man mee mbii kas, nen de moo satpwoo debuu nkaa wun, mon ndok tətək.

¹⁶ Wun a nen de baa wun a shishoot kas, dangbe koo di baa wun a shishoot kas, be taji wu sat nənee, << katpee fuu nə shínpee nwun mbee cìn shikbish kas. Dang nə ret kə nwun mwaan-mwaan deret mə kərem nNaan mo.

¹⁷ Wu shin dedes ngurum mo jir. Wu wal ndyemnəən fuu de mo a nendəm ndang Kristi mo jir, kə nwun sat a nkəər Naan. Wu shin dedes mishkoom dewur mbee fuu.

Wu kám shiimwaan nDaa Jesu Kristi

¹⁸ Wun de wun a kərem mo, wu sham kə kaa fuu mo ndər nenlu fuu mo, kəzak, wu shin dedes mmo ndəən mbii mo jir. Nə a təng kə nwun shin dedes mmo, koo di moo biyaal, koo de baa moo naa wun nyit kas, be nə ret kə nwun kələng mmo.

¹⁹ Ngwe dewur gung ndəən shwaajeel, be ngwe mənə man nənee, << gung ndəən jeel nə ret nNaan

nyit. Koo de gwar nə shwaa jeel nə, katɕang baa a mbee mee mbii debish dewur cìn kas. Nə ret kə a ngwe mənə kat pəlang pee gurum mo ɕi.

²⁰ Dang gwar dewur gung ndəən shwaa jeel a mbee mbii debish dewur cìn, be cirang dang wu naa mənə a kaa mee mbii deret pəlang wur sə ne? Gwar mənə lap a kwat mbii dewur kə ten cìn. Dang gwar de mo shin jeel wur a mbee mbii deret dewur cìn, ɕangbe wur gung ndəən jeel sə, nə ret kə a gwar mənə kat pəlang pee Naan ɕi.

²¹ Naan dewur pərep wun, kə nwun dee a nen wur mo, a wur le, mbəkə nwun shwaa jeel ɕesə mo, koo de wuu cìn mbii mo ndəre-ndəre, mbəde Daa Jesu Kristi shikáa wur wur shwaa jeel mbee wun. Nə ret kə nwun mwaan a ndəən shiimwaan wur.

²² Baa gyet Jesu wur cìn mee shikbish kas koo dəben. Baa wur nək mee gurum kas.

²³ Koo de gyet gurum mo fəlap wur, be baa wur lap mmo shi fəlap zak kas. Koo de gyet wur shwaa jeel nsar gurum mo, be baa wur sat nə wuɕin nkwaɕ mo shi jeel zak kas. Dang gyet wur lekáa wur a ndəən sar nNaan dewur ntokɕyeel ngurum mo ndəre-ndəre.

²⁴ Jesu shikáa wur, wur mang shikbish fun mo le nkaa shin, kaadi gyet mo pwas wur nkaa shiyeepyoom, mbəkə mun dee ɕi a nen de baa mu kuɕi muu mwaan ndəən shikbish kas, ɕangbe muu mwaan a ndəən ar seen, mbəkə mu cìn mbii deret ɕi. Mbə láa de Jesu wur kat, be mu dee a ɕebəbar.

²⁵ Gyet nyam be wuu dee a ɕeləloom kaa təm de mo dəm loom sə, ɕangbe nyaksə wuu baa wu jì.

Wu mwaan a ndang ngukiyeer fuu, wur dewur tap wun zak.

Tong deret nnaar mish kə mat mo

3

¹ Wun mat mo, nə ret kə nwun sham kə káa fuu mo ndər mish fuu mo, mbəkə katdang mee mish de baa wur shinzeen pwoo Naan kas, meebe wur ntuwap, kə wur shinzeen di mpwoo Naan, mbəde mwaan kə mat nə a deret, koo de baa mat nə war satpwoo Naan mmish nə shi pwoo kas.

² Mbəde mish fuu moo leyit, kə mo naa mwaan fuu mo di, kyet mwaan fuu nə mo a deret aa, koo a debish ghe. Kəzak, moo naa kyet wuu cìn mbii de Naan wur sat nə wu cìn aa, koo wuu cìn kas ghe?

³ Taji wu dee pan a nkaa ar de wun nlep lée mo nkaa suk fuu mo shidaar-shidaar kas, shii mənə, wu dee mpan jwat, kaa tepkáa, kə lep mbiikom, kə lep mbiitook mə makluwa mo sə. Kəzak, lep lée dekərəm mo nkaa suk fuu mo.

⁴ Dang wu yit kə ret fuu, nə put a ndəən pətuup fuu mo shidaar-shidaar. Wu gung mbii mo, kə nwun sham kə káa fuu mo zak. Mbəde ngyeel kə ret mənə, nii koop nə zam pə Naan di, kaa mbii deret sə.

⁵ Wu cìn pan nkaa mat diiyam-yam mo, de gyet moo leyit fur a nkaa Naan. Gyet shiimwaan mmo, nə le kə mmo dee a mat deret mo, mbəde mo sham kə káa fur mo ndər mish fur mo.

⁶ Seera, war dee a mee mbiikám. Gyet war kə mwaan ndəən ar mwaan deret, war pet Abraham a Daa fida. Katdang wun wu mwaan ndəən

shiimwaan war, be wun a jep war mo azeen. Wu gung. Taji wu ræbet kə mmee mbii lekæarmuut nwun kas.

⁷ Wun mish mo, nə ret kə nwun tong kə mat fuu mo ndəən ar de nə ret, mbəde wu man nənee, << baa mat mo kə ɓal a kaa mish mo sə kas. Mbəmənə wu shin dedes mmo, mbəde wun kə mo, wun ashak. Wun nkaa tap seen de Naan wur shin nwun nzuum. Katdang wu cìn mbii mo a ndəən ar deret desə, be baa mee mbii mmak le kə dangnaan fuu mo dee a buu kas.

Nen Naan mon nshwaajeel

⁸ Pwoo fen de mu kyes nə ndesə, nə ret kə pwoo fuu mo dee a deməndong, kəzak, wu naajeel nshak, wu walnshak, nendəm ndang Jesu mo, mbəde wun a dyemnəənshak mo ndəən Kristi. Wu fwangshak, kə nwun sham kə kaa fuu mo.

⁹ Katdang mee gurum cìn mbii debish nwun, be taji wu kwat mənə shi mbii debish zak kas. Katdang mee ngwe satpwoo debish nkaa wun, be taji wu fələp gwar mənə kas, dangbe nə ret kə nwun le deret nkaa nen mənə mo, mbəde mbii de nə le dangbe Naan wur pərep wun, kə nwun dee a nen wur mo, a mbəkə wur le deret di nkaa wun.

¹⁰ Duk kə ran ndəən ɓəət haal Naan nənee: <<<<Katdang mee ngwe kə ræbet tong shang shang ndəən seen deret, <<be taji gwar mənə kudi kə sat mee pwoo debish kas. <<Taji gwar mənə cìn dung kas.

¹¹ Nə a təng, be gwar mənə yit cìn mbii debish mo jir. <<Dang nə ret kə gwar mənə cìn a mbii deret mo bejee ɗak. <<Nə ret kə nwur sat a ntang

tongryang kə nwur kat nə zak, <<mbəkə wur kat tongryang de pə Naan.

¹² Naan wur tap nen de moo cìn mbii deret mo, shidaar-shidaar, <<kə Naan wur kələng dangnaan mmo. <<Dang nen de moo cìn mbii debish mo, be Naan wur cii mo.>>

¹³ Katdang wun nkaa gung, mbee cìn mbii deret mo, be a wii mmak tung wun kə mbii debish ghe?

¹⁴ Dang katdang wuu shwaajeel a mbəde wuu cìn mbii deret, be Naan wur nle deret nkaa wun, mbəmənə be, taji wu kəər nen de moo rəbet cìn mbii debish nwun kas. Taji wu an suk kas.

¹⁵ Dang nə ret kə nwun leyit a nkaa Kristi bejee. Wu yit kə wur dee a mishkoom ndəən pətuup fuu mo, kə ndəən mbii de wuu cìn mo jir. Wu tong shi dak suk, koo a pərang ghe, mbəkə nwun man mbii de wun nsat dī.

¹⁶ Wu sham kə kaa fuu mo ndər nnen de moo cìn tal desə mo pee wun dī, kəzak, wu cìn mbii de wu naa nə ret ndəən pətuup fuu mo shidaar-shidaar. Mbe kə katdang gurum mo sat mee pwoo debish nkaa məse fuu deret mə nendəm ndang Jesu Kristi, be yitlwaan ya mo dī.

¹⁷ Nə ret met mbəkə gurum shwaajeel mbee cìn mbii diiret, katdang nə a shi rəbet kə Naan, nə ret met ndi gurum nshwaajeel a mbee debish dewur kə cìn.

¹⁸ Daa Jesu Kristi wur shwaajeel a mbee shikbish fun mo yit məndong, be wur kyes dak mə vvang shikbish fun mo. Yit məndong be ngwe de ndəre wur muut mbee mun nenshikbish mo, mbəkə wur jì kə mun dī kus kə Naan. Gyet gurum mo tu wur ndəən nan, dangbe Naan le kə wur yol a

peemúut kə seen.

¹⁹ Kaadi Jesu wur kudi ndəən iiko mə riin wur, be wur dəm satpwoo Naan nriin de mo a shishoot, de mo a peemúut mo.

²⁰ Riin desə mo a riin de gyet mo cii kələng pwoo Naan, kaadi gyet Nowa nkaa dak tii am dedes. Jir kəsə be gyet Naan wur sat a ngung kə mo dak. Gyet mənə, be gurum mo a kong bejee dak, de mo ndəən tii nə, be baa am tu mo kas. Gyet gurum nə mo a pwookun bejee.

²¹ Am de gyet mo del ndəən nə, nə dee a koppee baptisma. Duk bam wun mbut shikbish fuu mo, a mbee baptisma, mbəde gyet Daa Jesu Kristi wur yol a peemúut. Suup de gyet mo suup wun, kaadi gyet mo cìn baptisma nwun sə, baa nə a mbəkə wur vwang pətuup fuu mo dee di a dəbang bejee kas. A mbee yol kə Daa Jesu Kristi a peemúut, dang wu kat bam ndəən shikbish fuu mo.

²² Daa Jesu wur kə ten kàa ndəən dengnaan. NYaksə be wur tong a nsarse nNaan. Wur a mishkoom nkaa nenlep nNaan mo, kə mbii mo jir de moo iiko.

Wu le Naan a mishkoom

4

¹ Kaadi gyet Jesu wur shwaajeel ndəən nan, nə aasə be nə ret kə nwun wu dak suk mbəkə nwun shwaajeel di ndəən nan kaadi gyet wur shwaa sə zak. Mbəde koo ngwe dedang nə, dewur shwaajeel ndəən nan desə, be wur yit shikbish.

² Yool nyaksi, taji wu yit kə coor mə pətuup fuu mo se korong nkaa wun kas, dangbe nə ret kə

nwun cìn a mbii de Naan kə rəbet kə nwun cìn shidaar-shidaar.

³ Wuu ten wu watpee des nkaa cìn mbii debish, kaa nen de baa mo man Naan kas, moo cìn sə. Taji wu cìn mbii mənə mo kas. Gyet nyam be wuu mwaan a ndəən coor mə nan fuu mo, baa gyet tong fuu nə mo ret kas. Gyet coor mə nan nə mo se korong nkaa wun. Gyet wuu sat a nshwaamwes, kə nə yuur wun di dak, shidaar-shidaar be wuu kuur ashak mbee shwaayuur, dedang gyet wuu seyil nkùm mo, jir mbii desə mo, be Naan wur cii mo hakyeng.

⁴ Dang nyaksə, baa wu kudi wuu cìn mbii debish sə mo ashak kə mo kas. Nə aapwoo ngurum mo, mbəde baa wu kudi wuu cìn mbii desə mo ashak kə mo kas, mbəmənə be moo kas wun.

⁵ Dang parmeeci, be nen desə mon ndar ntoom Naan, kə wur tokdyeel di mmo, mbee mbii de mo cìn mo ndəən nyil desə. Baa pee nə kudi jong-jong kas, aku Naan tokdyeel de mmo, nen de mo kudi kə seen ndəən nyil desə, kə nen de mo kə ten murep mo.

⁶ A nə le dang mo satpwoo Naan nə nen deməmurep mo, a mbee kə riin mmo kat seen di, kaadi Daa Naan wur kə seen sə.

⁷ Pardī yil desə nə nkyes, baa nə kə jì wul kas, mbəmənə wu tap kə kaa fuu mo, kə nwun dar di balbal, mbəkə nwun mak cìn dangnaan di.

⁸ Mbii de nə koop nə met jir nə a nənēē, << wu sat a walnshak shi pətuup məndong shidaar-shidaar. Mbəde katdang wuu wal ngurum mo, be baa wun nsat a pan shikbish de mo cìn mo nkaa wun kas.

⁹ Wu wang polu fuu mo nshak. Wu cin mbii ngurum a shi pətuup məndong.

¹⁰ Naan wur nle ɗeret nkaa wun ndəən ar mo shini-shinə. Wur shinbal ngurum mo mbee cìn ɗak mo shini-shinə. Mpeemənə, be nə ret kə koo we, be wur cìn ɗak nə ndəən ar ɗeret. Nə ret kə wur cìn ɗak kə bal ɗe Naan kə le nə nsar fuu, mbəkə nwun bam gurum mo ɗi.

¹¹ Katɗang Naan wur cin a iiko mee gurum ɗe mə sat mee pwoo ngurum, be wu yit kə gwar mənə sat a pwoo ɗe nə put pee Naan ɗi. Katɗang Naan wur shin mmee gurum, a iiko ɗe mə cìn ɗak mbee niyee mo, be wu yit kə wur shin ɗedes nNaan mbee mbii mo jir, ndəən Jesu Kristi. A wur a ngwe ɗewur kə ɗedes kə iiko mbe ngha-ngha. Amin.

Jeel ɗe wuu shwaa mo

¹² Wun ɗi kən wal nwun, taji nə ɗee nwun a mbii aapwoo kas, mbəɗe wu ɗel ndəən jeel denaat mo ɗes. Mbii ɗesə mo kat wun, a mbəkə mo cam shinzeen fuu ɗi ndəən Naan. Mpeemənə taji wu pan nə jeel ɗe mo jì nkaa wun nə, mo a mee mbii ɗiɗɗik kas.

¹³ Wun a nkaa balkaa ndəən jeel ɗe gyet Daa Jesu Kristi wur kə shwaa, mbəkə parpuus ɗe gurum mon nnaa ɗedes wur agaak, be wun ngam kə retnyit.

¹⁴ Katɗang gurum mo sat mee pwoo ɗebuu nkaa wun, mbəɗe wun a nen mə Kristi mo, be wu cìn retnyit, mbəɗe Riin nNaan ɗewur a ɗedes hakyeng wur ashak kə wun.

¹⁵ Dang katɗang mee gurum shwajeel a mbəɗe wur cìn mbii ɗebish, kaa tukáa sə, koo cìn wat,

koo ngule pwoo ndəən mbii de baa wur dəən nə kas, baa kyeet kə shwaajeel mənə kə mee mbii deret dəən nə, de gurum mon nkwoop nə kas. Wu tap kə kaa fuu mo. Taji mee ngwe cìn mbii debish, de nə nle kə wur lap nkyeet kə kwat mənə kas.

¹⁶ Dang kat mee ngwe shwaajeel, a mbəde wur a ngutaa ndang Kristi, be taji wur kat yitlwaan kas, dangbe nə ret kə wur kwoop Naan, mbəde gurum moo naa wur a ngwe mə Kristi.

¹⁷ Katdang pee nə wul de Naan wur ntokdyeel ngurum mo, be wur nshee a nkaa nen wur mo. Katdang Naan wur nshee tokdyeel nə a nkaa nen wur mo, be a me ncìn kə nen de mo ciipwoo Naan ne?

¹⁸ Nə a rəran ndəən bəət haal nNaan nənee: <<<<Katdang nə nluk, mbəkə nenderet mo kat bam, <<be a me nkat nen shikbish de baa mo man Naan kas se?>>

¹⁹ Mbəmənə nen de mo shwaajeel, de nə a shi rəbet nNaan, be nə ret kə mo sat a ncìn mbii deret mo. Kəzak, nə ret kə mo lekaa fur ndəən sar nNaan dewur le mo, kə dewur gam mbii mo jir. Mbii dewur sat nə, wudin ncìn mmo.

Təm nNaan mo

5

¹ Wen kə mee mbii mbee sat nwun, wun de wun a nennan mo ndəən Ekilisyā. Wen shikaa fen, an a ngunan kaa wun sə. Gyet nyam, be an kən naa shi yit fen kyeet kən shwaajeel de gyet Daa Jesu wur shwaa, dangbe nyaksə, ghan kən balkaa kə wun, mbəkə mo naa dedes Jesu di nə ndəən mun, de Naan wur woo nə mmun agaak. A mbəmənə, be wen kən dang pə wun nənee,

² wu naa nen Naan mo. Nen dewur le mo nsar fuu, mbəkə nwun tap mo di. Wu tap mo kaadi ngukiyeer təm wur tap təm wur mo sə, mbəkə taji mee mbii tung mo kas. Taji wu cìn dak nə a kaadi mee gurum sat nə, təng wu cìn sə kas. Dang wu cìn dak shi pətuup məndong, kaadi gurum kə fes cìn káa wur mbee cìn dak sə. Wu lekáa fuu mo nkaa cìn dak desə nə. Kaji wu dee nleyit a nkaa shool de gurum mon nkwat wun kas, mbəde nə a mbii naashweep kə gurum dee, ntang shool ndəən dak kaa desə sə.

³ Taji wu dee nkám bəl fuu nkaa nen de Naan wur le mo nsar fuu kas, mbəkə nwun tap mo di. Dang nə ret kə shiimwaan fuu mo dee a mbii de nə ret kám ngurum mo.

⁴ Katdang mwaan fuu nə mo a deret, be parpuus de Daa Jesu Kristi, dewur a káa nenkyeer təm nə mo, wur njì put agaak, mbəkə gurum mo naa wur di jir, be wur ncìn mee mbiizuum de shang de nii koop nə hakyeng nwun nen de wu dar balbal. Mbiizuum desə nə a de ngha-nghan de baa nə ncam wat kas.

⁵ Wun jepzəlang mo, wu sham kə káa fuu mo ndər nennan mo. Wun jir, wu shin dedes nshak, kə nwun tong shi dak suk mbee cìn dak nshak. Mbəde nə a rəran ndəən bəət haal nNaan nənee: <<<<Naan wur cii nenroop mo, <<đangbe wur le deret nkaa nen de mo sham kə káa fur mo.>>

⁶ Nə aasə be wen kən sat nwun nənee, << wu sham kə káa fuu mo ntoom nNaan dewur kə bal, mbəkə wur diyeep wun di, katdang wur naapee nə wul wur nyit.

⁷ Mbii de moo daampee nwun jir, be wu le mo ndəən sar nNaan, mbəde a wur tap wun jir.

⁸ Taji wu dee ntan kas, dangbe wu tong shi gongpee, mbæde shaarlek fuu Ngujwaan wur kə mwaan mass-mass kaa mbwoor de nə wal kaadi nə nkaa tang ngwe de nə nse.

⁹ Wu ɗar balbal. Taji wu shin pee nwur kas. Wu sekyeen kə cìn ɗak nNaan bejee ɗak. Taji kəarmuut ya wun kas. Wu man nənee, << ɗyemnəən fuu nen Jesu mo koo a nə ndəən nyil ɗesə, be mon nkaa shwaajeel kaadi wuu shwaajeel nyaksə sə.

¹⁰ Katɗang wu shwaajeel nə mbee reppee lee, be Naan de mbii ɗeret mo jir, moo put a pee wur ɗi, wur de gyet wur pet wun, mbəkə nwun tong ɗi ashak kə Kristi ndəən ɗedes wur, de nə dəm ngha-nga. A Naan shikáa wur, wur nji ɗak wun. Wur nshin bal nwun, mbəkə nwun ɗar ɗi balbal ndəən mbii mo jir.

¹¹ Naan wur le kə bal wur nə dee ashak kə wun jir. Amin.

Pwoo mə kyes nə mo

¹² A Silas bam ghan mbee ran rep wasika ɗesə nə, nwun. Wen kən naa wur a kaa ɗyemnəən ndəən Kristi sə, ɗewur koop nə hakyeng, de gurun mak gáŋkáa nkaa wur. Wen kən ran pwoo ɗesə mo nwun, a mbəkə nghan caa pətuup fuu mo ɗi. Wen a nkaa sat zeen nə nwun agaak nənee, << Naan wur le ɗeret nkaa wun.

¹³ Ekilisa de nə ndəən pee ɗesə nyil mBabilon, de Naan wur kə ten bilip nə, kaadi wur bilip wun sə, moo tok kə wun jir. Làa fen Maak wur tok kə wun zak.

¹⁴ Wun zak, wu tok kə shak ndəən wal, kə nə kám ɗi nənee, << wuu wal nshak kaa ɗyemnəən

de moo dæm ndang Jesu ashak sə. Wu yit kə ryang
nDaa Jesu Kristi nə tong ashak kə wun jir, wun de
wun a mə Jesu Kristi mo. Amin.

Manji Yiljep Mupun New Testament

copyright © 2024 Initiative for the Translation and Development of African Languages and The Seed Company

Language: Mupun (Mwaghavul)

Contributor: Initiative for the Translation and Development of African Languages

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-07-03

PDF generated using Haiola and XeLaTeX on 10 Sep 2025 from source files dated 3 Jul 2025

77a1013c-7c23-599f-9af1-1adbfc09489